

Préf. 1899 - Lou creserèu de Marius Chabrand

Maiano, 20 de mars 1899.

Ami Chabrand, pèr saluda toun Creserèu e lou bèn astruga dins soun bandimen au publi, fau que te doune lou bon-jour.

Siés ço qu'apellon un bon ome, un prouvençau que n'a pas crento de soun endré ni de sa lengo, ni de soun biais, ni de si crèire, ni de larga si verita i bedigas e is arlèri que van trahissènt la Prouvènço.

I'a dous milo an qu'un grand engèni, qu'un fiéu de pèd terrous lou crido is enfant de la terro:

O fortunato nimium, sua si bona norint agricolas! (Virg.)

(Se couneissien ço qu'an de bon, ah! trop urous li païsan!)

E aquel autre que disié:

*Beatus qui procul negotiis
Paterna rura bobus incolit suis. (Hor.)*

(Urous aquéu que pòu, liuen dis afaire,
laboura 'mé si biòu lou bèn que i'an leissa!)

E 'm' acò, aquéli badau, aquéli creserèu (coume lou de ta coumèdi), entre qu'an acampa de que viéure sus lou siéu, cercon, li pau-de-sèn, qu'à faire de clamo de si chato e de moussurot de si drole. Apellan acò: li leva de la peno.

E pèr un que capito, o que, coume Moussu Loubet, vèn Presidènt de la Republico, n'i'a de mouloun que pèr teni, coume dison, soun rèng, fau que tutto sa vido baison patin e tiron l'encho. Demandon-ié à Moussu Loubet, qu'es un enfant de meinagié, e que saup ço que n'es de la liberta dóu campèstre e de l'embroi di gròssi plaço, dóu segrenun de l'Elisèu e dóu soulèu de la bastido, demandon-ié s'amarié pas mai vèire, éu, lou matin, sa bono vièjo maire arriba si galino, à soun mas de Marsano, que de legi li letro que ié plovon à fais de tóuti li sicut-et-nos, pateroun e quistoun de la Republico franceso!

Mai es ansin, auren bèu piéuta: tant que lou mounde durara, Adam faudra que vire e que se destermene d'aquí-que fugue foro dóu paradis terrèstre. Lou plus court es de rire de l'umano foulé, coume as fa, brave Chabrand, dins la coumèdi que publiques e que faguè tant rire li gènt de Gravesoun e de Castèu-Reinard. Adounc tèn-te gaiard.

F. Mistral.

© CIEL d'Oc – Juliet 2009